

■ COLUMNA

#Me too – 68

DA ROMAN CAVIEZEL, CUIRA

Tge frust, noss mund, ozendi. E paupers mats. Pelvair, tant testosterone e gnanc in sulet inimitg endretg en vista! Jau na manegel betg clauns postfactics ni tribuns populistics, anc pli pauc islamists ni neofaschists, na, inimitgs serius, ch'i vala er la paina da cumbatter.

Pertge è la vita usché malgista? Nossa generaziun aveva inimitgs da sterner, anno 68, material da far flucs tut a dubel: autoritads – nundumbraivlas, enturn ed enturn, capitalism, tradiziuns, guerras... ina spierta senza fin. E nus avain acceptà la sontga obligaziun da far chaneras, da sajettar e metter tut sut-sura, tant sco ils ormons vulevan.

Sche vus savessas, giuvenoters, tge kick infernal che quai era! Babs, bancas, baselgia – pamfate!, dictaturs, imperialists, militarists (cun cresmada d'onur per ils yankees) – pamfate!, ritguns e reacziunaris – pamfate! E tge gaudi ultimativ da sa dustar cunter tut quai che savurava da vegl, cun barricadas e sit-ins, cun teccas e teorias,



senza fin e misericordia! Rockar il Pur suveran per in meglier mund, quai era psicoterapia per in'entira generaziun, zacherblengias. Al guardai oz, il mund, i ha bain rendì!

Donn che ni Marx ni Che Guevara han pudì giudair ils fritgs da lur stentas. Els avessan franc gi plaschair vi da nus guerilleros grischuns che avain suandà noss gurus, betg tschoccamain, per l'amur da Dieu, anzi, adina cun distanza critica – mintga tof vegniva reflectà dialecticamein, per amur da la revoluziun. Enfin l'outfit: in T-shirt cun si il Che, in pèr bluejeans tschufs e tut put pail e chavel, pura naturaleza, sco il comandante en la giungla, be senza stumpa cubana. – Auter che chics, rintgas da nas, deos e tat-

toos sin chau e tgil sco oz! – Hasta la victoria siempre, hombre. Aber paupers quels sco jau, hormonalmain dischavantagiads, che stuevan sa cuntentar cun tschintg pails vid il mintun! Ja sent anc oz l'umiliaziun da quest deficit genetic.

Cun la medema nettegiada avain nus lur liberà er anc la dunna. Gea, i fuva in act exemplaric, anzi catarctic, cur ch'il BH è vegnì arsentà publicamain e bandischà ina giada per adina da la gardaroba da la dunna moderna. Quest simbol umiliant da la dictatura da l'establishment masculin-burgais, che aveva serrà en il corp feminin durant (sentids) tschientaners! Faschai quint, ozendi, en in temp da push-ups magari aggressiv, ina giuventetgna feminina cun free-hangers! Quai fiss bain inimaginavel. Tant pli pauc sut in'antieriura chamischa da militar dal bab, reciclada en furma da minijupe. Dernier cri dal styling giuvenil-revoluziunar dals onns 70.

Jau ma dumond mo per tge ch'igl è i 50 onns enfin #Me too, suenter nossas preparativas fundamentalas. Il testosterone na sto tut-tina betg avair bastà!